

Utoqqaat Siunnersuisooqatigiivisa ataatsimiinnerannit imaqarniliaq

Piffissaq: Pingasunngorneq maajip 23-at
nal. 13.00-15.00
Sumiiffik: Imaneq 34, 2. salimi

Ataatsimeeqataasut:

Laannguaq Lyngø, siulittaasoq(LL)
Loritha Henriksen, siulittaasup tullia (peqataasinnaanani nalunaarpoq angalanini pissutigalugu)
Søren Joelsen, ilaasortaq(SJ)
Bodil Karlshøj Poulsen, ilaasortaq
Elias Heilmann, ilaasortaq(EH)
Jonas Napatoq, sinniisoq – napparsimanini pissutigalugu peqataanngitsoq

Isak Nielsen Kleist, Pisortaaneq(ISNK)
Cecilie Schierbeck, fagcheffiugallartoq(CVS)

Lars Jørgen Kleist, imaqarniliortoq(LJK)

Oqaluuserisassat:

- 1. Tikilluaqqusineq oqaluuserisassallu akuersissutigineri – Laannguaq Lyngø, Siulittaasoq**
- 2. Kingullermik ataatsimiinnermi naalisakkap akuersissutigineqarnera**
2017-imi aggustip 22-iani naalisagaq akuersissutigineqarpoq.

3. Ilisimatitseqatigiinneq

Pisortaaneq nutaaq

- Laannguaq Lyngø(LL) – tikilluaqqusivoq Isak Nielsen Kleistilu imminut ilisaritippoq. Namminersorlutik Oqartussani Inuussutissarsiutinut Naalakkersuisooqarfinni immikkoortortaqarfinni pisortaasimavoq ilaatigullu siullermik Piareersarfik kingornalu MAJORIAQ akisussaaffigisimallugit. ISNK suliffeqarnermut tunngasunik suliaqaqqinnissani nuannaarutigivaa. Nuannaarutigivaa aamma isumaginninnerup iluani aamma matumani utoqqarnut tunngasunik sulinissaminut periarfissinneqarami.

Elias Heilmann ilaasortaanerminit tunuarpoq

- Elias Heilmann Utoqqaat Siunnersuisooqatigiivini tunngavilersuuteqarani tunuarpoq. Isumaarpoq siunnersuisooqatigiit siunertaq malillugu ingerlanngitsut. Taamaattumik Utoqqaat Siunnersuisooqatigiivi qinnuigivai Utoqqaat Siunnersuisooqatigiiviniit tunuarniarnerminik akuersissasut. (Siunnersuisooqatigiit ataatsimiinnissap tulliani Elias

Heilmannip tunuarniuteqarnera eqqartorlugulu akuerissavaat siunnersuisooqatigiinnilu sinniisussamik ivertitsillutik).

- **Pilutap pulaarnissaanik kissaateqarneq –**

Pilutaq pilersaarutaasumik Ingerlatsivimmit ataatsimeeqatigineqassaaq maajip 28-ani 2018. Ingerlatsiviup Utoqqaat Siunnersuisooqatigiivisa Pilutamik aasaanerani ferilinnnginnermi ataatsimeeqateqarsinnaanerit misissussavaa – CVS ullulerneqarnissaanik isumaqatigiissuteqassaaq juuni qiteqquppallaartinnagu.

- Utoqqaat Siunnersuisooqatigiivisa aamma Isumaginninnermut Suliffeqarnermullu Ingerlatsiviup akornanni ulloq 3 aprili 2018-imi ataatsimiititami siulittaasoq aamma utoqqarnut tunngasunut fagchefiugallartoq Cecilie Schierbeck peqatigalugit ataatsimeeqatigiinneq ilisimatitsissutigineqarpoq. Utoqqaat peqatigiiffiata Utoqqaat Siunnersuisooqatigiivini ataatsimeeqateqarnissaaq kissaatigisimavaa. Utoqqaat peqatigiiffianit Utoqqaat Siunnersuisooqatigiivi annertunerusumik paasisaqarfiginissaa, ilaatigut kikkut Utoqqaat Siunnersuisooqatigiivini ilaasortaanersut il.il., kissaatigineqarpoq. Utoqqaat peqatigiiffianni Alibak Nathansen siulittaasuvoq, ataatsimiinnerlu ulluinnarni ataasinnngornikkut imaluunniit sisamanngornikkut pisinnaavoq. Utoqqaat Siunnersuisooqatigiivi aalajangerput ataatsimiinneq pulaarnerlu pissasut aggustimi 2018-imi.

- **Utoqqarnut politikkip atuutilersikkiartuaarnissaa**

Utoqqaat Siunnersuisooqatigiit Utoqqarnut politikkip qaqugu atuutilersinneqarnissaa paaserusuppaat - taanna akuerineqareemat, taamaalluni malinnaasoqarniassamat. Aammattaaq immikkoortunut pilersaarutit qanoq atuutilersinneqarnissaaq ilanngullugu.

Ingerlatsiviup nassuiaatigivaa Utoqqarnut politikki assut imarisaqarluartuusooq kapitalerpassuaqarlunilu. Taamaattumik suliniutit il.il. atuutilersinneqarnissaaq piffissartornassasoq. Nassuiaartigineqarpoq Utoqqarnut politikki Immikkoortunut pilersaarutit suliaralugit ingerlateqqinneqartut. Kommunalbestyrelsimit ukioq kingulleq immikkoortoq 3 akuersissutigineqarpoq, tassa imaappoq, Utoqqarnut politikki kommunimi immikkoortunut susassaqaarfiusunut ingerlateqqinneqareersoq. Isumaginninnermut Suliffeqarnermullu ataatsimiititami Utoqqaat Siunnersuisooqatigiivnut ilisimatitsissuteqartoqassaaq.

Inissiat utoqqarnut naleqquttut allallu pillugit.

Utoqqaat Siunnersuisooqatigiivi Utoqqarnut politikki inissianik atuisunut naleqqunnerusunik ujartuipput, aamma utoqqaat namminneq sapinngisamik angerlarsimaffiminniinnarsinnaanerit pillugu. Ujartorneqarportaaq utoqqarnut inissiat ulluunerani paaqqinnittarfiit qanittuini inissinneqarsinnaanerit, taamaalluni meeqqat ulluinnarni attavigineqarsinnaasunngolugit.

Saniatigut inissiaqarfiit eqqaanni aputaajaasernerup naleqqunnerunissaa kissaatigineqarpoq. Pingaartumik pitsorluttut eqqarsaatigalugit aputaajaasernerup pitsaanerusumik ataqatigiissaarneqartarnissaa kissaatigineqarpoq aamma aputaajaanermi qanoq aputaajaaneq eqqarsaatigineqartarnissaa pillugu.

Ingerlatsivik nassuiaavoq, Kommunalbestyrelsip utoqqaat sapinngisamik namminneq angerlarsimaffiminniittarnissaa politikkerigaa aamma Pisortaqatigiit ataatsimiinneranni



ilaatigut Utoqqarnut inissiat sanaartorneqartussat eqqartorneqarsimasut, taamaattumik suliat ingerlapput.

Arctic Age pillugu suliniutigineqartoq eqqarsaatigalugu tikikkuminassuseq tassani eqqumaffiginiarneqartut ilagivaat, tassani inuiaqatigiinni Utoqqaat eqqarsaatigineqarput, pingaartumillu utoqqaat illuinik nutaanik sumi sanaartorluni inissiisoqarnissaa pillugu. Utoqqarnut politikkimi aalajangersimasunik anguniakkat allat eqqarsaatigalugit ilanngullugu oqaatigineqarpoq puiguttortunik sullissisinnaasunik qulakkeerinnittoqassasoq, kommunimi utoqqaat amerliartormata. Ingerlatsiviup sulisut innuttaasunut attaveqartut ilinniartillugit aallartereerpai, utoqqaallu pitsaanerusumik sullinnissaannut sakkussaalerput.

Utoqqarnut illu / Sammisassaqaartitsivik

Utoqqaat Siunnersuisooqatigiivinit ulluinnarni ornittagassamik ataatsimooqatigiiffiusinnaasumik amigaateqarneq oqaatigineqarpoq. Utoqqaat peqatigiiffiat 70-it sinnerlugit ilaasortaqqarpoq. Iluamik ataatsimooqatigiiffiusinnaasoq amigaatigineqarpoq. Ulluinnarni orninneqartartut iluamik sammisassaqaartitsiviunngillat ilaasortat bingoaranngippata allamilluunniit.. Taamaattumik peqqissaartumik utoqqaat sumut orniguttarnissaat sammisasaqartinneqartarnissaallu oqaluuserineqassaaq.

Puiguttortunut angerlarsimaffik

Isumaginninnermut Suliffeqarnermullu ataatsimiititamit aamma Puiguttortut angerlarsimaffissaannik pilersitsinissaq politikikkut akuerineqareerpoq - pilersaarusiartu suliarineqarpoq - aatsaalli ukiut marluk iluini piviusunngortinneqarsinnaalluni.

Utoqqaat Siunnersuisooqatigiivinit tusarniaanerit

Utoqqaat Siunnersuisooqatigiivi siunnersuisooqatigiinni siullermeerlutik ataatsimiinneranni utoqqarnut tunngasunik suliani tusarniaavigineqartarnissaat pillugu ilisimatinneqarput. Ajorluartumilli kommunimit kukkusoqarnikkut tamanna eqqumaffigineqarsimanngilaq. Tamanna Utoqqaat Siunnersuisooqatigiivinit ajuusaarnartinneqarpoq paasineqarporlu assersuutigalugu utoqqarnut inissiassat pillugit siunnersuisooqatigiit tusarniaaffigineqarsimanngitsut.

Taamaattumik Utoqqaat Siunnersuisooqatigiiviniit Kommuneqarfik Sermersuup ammasumik tatiginnittumillu susassaqaarfiit tamaasa (siunnersuisooqatigiit il.il.) pilersaarutitut suliniutinullu akuutinneqarnissaat qilanaarineqarpoq.

Una pillugu suliniut: Qanigisaasunik suleqateqarneq

Ingerlatsivimmit ilisimatitsissutigineqarpoq suliniut Qanigisaasunik suleqateqarnermut tunngasumik najoqqutassiormut tunngasoq aallartilaareersoq. AC Siunnersorti tamatuminnga misissuilluni aallartippoq, Ingerlatsiviullu Utoqqaat Siunnersuisooqatigiivi sulinermit tassani peqataanissaat kissaatigivaa. Suliniulli Isumaginninnermut Suliffeqarnermullu ataatsimiititami akuersissutigineqaaqqartussaavoq aamma Utoqqaat Siunnersuisooqatigiivinit susassaqaartunullu allanut uppersarsarneqartussaavoq suliap inaarutaasumik aallartinneqannginnerani.

4. Ataatsimiinnermit kingullermit malitseqartitsineq

Utoqqaat Siunnersuisooqatigiivisa innuttaasunik ataatsimiititsinissaannut kommunip aningaasanik tapiissuteqarsinnaanera qanoq periarfissaqaqarnersoq misissorneqarpoq.



- Utoqqaat Siunnersuisooqatigiivi kingullermik ataatsimiikkamik innuttaasunik ataatsimiititsinissaq periarfissaqarnerseqq paaserusuppaat. Pingaaruteqarpoq Utoqqaat Siunnersuisooqatigiivisa innuttaasunik paasisitsiniaalluni ataatsimiititsinissaannut aningaasanik immikkoortitanik nassaartoqarnissaa. Siunertamut taama ittumut aningaasanik immikkoortitanik sumi nassaassaqaqarnerseqq Ingerlatsiviup misissussavaa.

Ippiarsuup siulersuisuisa ataatsimiinnerani peqataaneq.

Isumaginninnermut Suliffeqarnermullu Ingerlatsiviup Ippiarsummi siulersuisut tulliani ataatsimiinnissaannut Utoqqaat Siunnersuisooqatigiivi aggersassavai. Kvartalip tulliani Ippiarsummi siulersuisut ataatsimiissapput. Ceciliep ataatsimiinneq aaqquissutissavaa.

5. Utoqqaat Qallunaat Nunaannut qimarrannerat

Taannaavoq ataatsimiinnissamut, qarasaasiakkut oqaluuserisassaniittoq, taassungalu ilanngussaq utoqqaat aallartut tikerartullu pillugit kisitsisitigut paasissutissat nassuiaatitallit nassiunneqartut.

Utoqqaat Siunnersuisooqatigiit kissaatigivaat kisitsisit paasissutissat erseqqinnerusumik nassuiaateqartinneqarnissaat - takuneqarsinnaasunngorlugu Kalaallit Nunaanni kommunimit sorlermit aallaratoqarsimanera. Utoqqaat Siunnersuisooqatigiit taamaalillutik ataatsimiinnissap tulliani qanoq amerlatigisut Kalaallit Nunaannut utertarnersut kisitsisinngorlugit kissaatigivaat.

Utoqqaat Siunnersuisooqatigiivinit utoqqaat taama amerlatigisut Qallunaat Nunaannut nuunnissaminnik aalajangertarnerat ernumanartoqartinneqarpoq. Utoqqaat Siunnersuisooqatigiivinit paaserusunneqarpoq sooq utoqqaat Qallunaat Nunaannut nuuttarnersut, pissutaava maani Kalaallit Nunaanni inuuneq naammaginnartingimassuk? Pissutaava Peqqinnissaqarfiup naammaginnartinneqannginnera imaluunniit Kalaallit Nunaanni inuunissaq artornarpallaarpa?

Utoqqaat Siunnersuisooqatigiivisa suleriaasiat naapertorlugu Utoqqaat Siunnersuisooqatigiivi ukiumut ataasiarlutik Isumaginninnermut Suliffeqarnermullu Ataatsimiititaq ataatsimeeqatigisartussaavaa, Kommuneqarfik Sermersuumi utoqqaat atugaannik eqqartuiffiusussaq.

Tassani Utoqqaat Siunnersuisooqatigiivi utoqqaat atugaat/ajornartorsiutaat Utoqqaat Siunnersuisooqatigiivinit Isumaginninnermut Suliffeqarnermullu Ataatsimiititamut malugeqqusai saqqummiunneqassapput:

- o Utoqqaat amerlassusii kisitsisinngorlugit paasissutissiissutigineqarnissaat
- o Utoqqarnut inissiat tikikkuminartuunissaat najoruminartuunissaallu eqqumaffigineqassaaq
- o Utoqqaat assigiinngitsunik pensioneqartinneqartut
- o Kalaallit Nunaanni Peqqinnissaqarfiup kiffartuussinera – utoqqaat Qallunaat Nunaannut nuuttarnernannut pissutaaqataasinnaavoq imaluunniit pissutaavoq

Taassuma saniatigut Utoqqaat Siunnersuisooqatigiivinit tikkuarneqarpoq aaqquissutaasinnaasutut ingerlateqqinneqarsinnaasut, soorlu:



- Ersarissuseq – Kommuneqarfik Sermersuumi kikkut Utoqqaat Siunnersuisooqatigiiviniippat?
- Utoqqaat oqaaseqartartuat – Kalaallit Nunaanni Utoqqaat oqaaseqartartuannik pisariaqartitsisoqarpoq, pitsaanerusumik inuuniarnikkut atugassaqartitsinermik pisinnaatitaaffinnik utoqqaallu soqutigisaannik sullissisussamik.

Utoqqaat Siunnersuisooqatigiivi aalajangerput Isumaginninnermut Suliffeqarnermullu Ingerlatsivik Isumaginninnermut Suliffeqarnermullu ataatsimiititamut siunnersuusiussasoq ataatsimiinnermi qulequttat sammineqartussat pillugit. Siunnersuusiassami qulequttat imarisaalu Utoqqaat Siunnersuisooqatigiivinit oqaaseqarfigisassanngortinneqassapput Isumaginninnermut Suliffeqarnermullu ataatsimiititamut ingerlateqqinnginnerini.

Utoqqaat Siunnersuisooqatigiivisa kissaatigivaat utoqqarnut tunngasut kingusinnerusukkut Kommunalbestyrelsimit suliarineqarnissaat.

6. Puiguttortunut iliuusissaq

Esbjerg Kommuniimi puiguttortunut iliuuseq aallaavigalugu Kommuneqarfik Sermersuumi qanoq isikkoqartinneqarnissaa eqqartorneqassaaq.

Esbjerg Kommuniata puiguttortunut iliuusissaata imarisai Isumaginninnermut Suliffeqarnermullu ingerlatsivimmit takussutissanngorlugit suliarineqarpoq. Imarisaani ima qulequtaqarput:

- **IMARISAI**
- Siulequt
- Takorluugaq
- Ataqqinassuseqarneq aamma puituttorneq
- Pitsaaliuineq siusissukkullu suussusersiinissaq
- Piginnaanngorsaaqqinnerit
- Qanigisat
- Piginnaasanik ineriartortitsinerit ilisimasanillu avitseqatigiinnerit
- Innuttaaqataaneq
- Puiguttortortornerup ingerlasimanera
- Suleqatigisat

Utoqqaat Siunnersuisooqatigiivinit kissaatigineqarpoq qulequtaq workshoppeqartitsisoqarnerani oqallisigineqarsinnaassasoq.

Isumaginninnermut Suliffeqarnermullu ingerlatsivimmit nalunaarutigineqarpoq pilersaarutaasoq Kommuneqarfik Sermersuumi utoqqaat isumasioqatigiissinneqassasut. Utoqqaat isumasioqatigiissinneqarneranni qulequttat arlallit eqqartorneqarsinnaapput tassanilu aamma puiguttortunut iliuusissaq immikkut isumasioqatigiinnermi qulequtaritinneqarsinnaavoq.

Utoqqaat Siunnersuisooqatigiivinit puiguttortunut iliuusissaq immikkut Kommuneqarfik Sermersuumi Utoqqaat isumasioqatigiissinneqarnissaanni sammineqarnissaa isumaqataaffigineqarpoq.

7. Utoqqarnut tunngasunik kisitsisinngorlugu takussutissiaq (Oqaluuserisassanut ilaajuaannartoq)

Apriilimi 2018-imi puiguttortut kisitsisinngorlugit



- 2017-imi Kommuneqarfik Sermersuumi innuttaasut akornanni puiguttornerup qanoq annertutiginera Isumaginninnermut Suliffeqarnermullu ingerlatsivimmit nutarterlugu saqqummiunneqarpoq
Utoqqarnut tunngasunik kisitsisinngorlugu takussutissaq aprili 2018 Utoqqaat Siunnersuisooqatigiivinit tusaatissatut tiguneqarpoq.

8. Utoqqaat Siunnersuisooqatigiivi aamma Isumaginninnermut Suliffeqarnermullu ataatsimiititap ataatsimiiffissaannik pilersaarusionerq

- Isumaginninnermut Suliffeqarnermullu ingerlatsiviup misissussavaa qaqugu Isumaginninnermut Suliffeqarnermullu ataatsimiititamik ataatsimeeqateqarsinnaaneq. Septembarimi 2018-imi pissaaq, aasaanerani sulinngiffik qaangiussimalerpat.

9. Allat taasariaqartut

Laannguaq tusagaqarsimavoq Tasiilami Utoqqaat peqatigiiffiat pilersinneqarsimasoq? Ataatsimiinnermi peqataasut allat tusagaqarsimanngillat - tamannalu Isumaginninnermut Suliffeqarnermullu ingerlatsivimmit paasiniarneqassaaq.

Bodil apeqquteqarpoq Nuussuup Mannguani ilaqutariinnut meerartalinnut utoqqarnullu sammisassaqartitsivimmik illoqannginnersamik pilersaaruteqartoqarneranik tusagaqartoqarsimanersoq. – nunataa toqqissunngorlugu. Tamanna eqqorpat kissaatigivaa Utoqqaat Siunnersuisooqatigiivi tusarniarneqassasut.

Isumaginninnermut Suliffeqarnermullu ingerlatsiviup misissussavaa Utoqqaallu Siunnersuisooqatigiivi tamanna pillugu uterfigeqqinneqassapput.